



ՀԱՅՈՑ ՀԱՅՐԱՊԵՏԻ ԾՆՆԴՅԱՆ ԵՎ ԳԱՀԱԿԱԼՈՒԹՅԱՆ
ՏԱՐԵԴԱՐՁՆԵՐԻՆ ՆՎԻՐՎԱԾ ՀԱՆԴԻՍՈՒԹՅՈՒՆ ՄԱՅՐ
ԱԹՈՌՈՒՄ

Սույն թվականի սեպտեմբերի 27-ին, կիրակի օրը, Վարագա Ս. Խաչի տոնին, հավարտ ա. պատարագի, Վեհաբանի հանդիսությունների սրահում տեղի է ունենում Նորին Սուրբ Օծություն Տ. Տ. Վազգեն Ա Ամենայն Հայոց կաթողիկոսի ծննդյան 79 և գահակալության 22-րդ տարեդարձներին նվիրված ընդունելություն-ճաշկերույթ:

Սույն հանդիսությանը ներկա էին արտասահմանի և ներքին մի շարք թեմերի առաջնորդ սրբազան հայրեր, Գերագույն Հոգևոր Խորհրդի անդամները, Մայր Աթոռի միաբանությունեն ու պաշտոնությունը, Մայր Աթոռի բարերարներ, Հայաստանի մտավորականության ներկայացուցիչներ և բազմաթիվ այլ հյուրեր:

Հանդիսությանը ներկա էին նաև Հայկական ՍՍՀ Մինիստրների խորհրդին առընթեր Հայ Եկեղեցու գործերի խորհրդի նախագահ տիար Ստ. Վարդանյանը և տեղակալ տիար Ռ. Զարգարյանը:

Հանուն Գերագույն Հոգևոր Խորհրդի, Վեհափառ Հայրապետի գույգ տարեդարձները շնորհավորում և բարեմաղթության խոսք է ասում Գերագույն Հոգևոր Խորհրդի ատենապետ գերաշնորհ Տ. Սիոն արքեպս. Մանուկյանը՝ մաղթելով Վեհափառ Հայրապետին արդյունաշատ և հովվապետական բազում բեղմնավոր տարիներ, լի հաջողություններով և նորանոր ծրագրերի իրագործմամբ:

Այնուհետև խոսք է առնում Հայկական ՍՍՀ Մինիստրների խորհրդին առընթեր Հայ Եկեղեցու գործերի խորհրդի նախագահ տիար Ստ. Վարդանյանը, որը, շնորհավորելով Վեհափառ Հայրապետին գույգ տարեդարձների աթիվ, մաղթում է արևաշատ բազում տարիներ, միաժամանակ վեր հանում ազգային և մշակութային առումով Նորին Սրբության գահակալության երեսունեկու տարիների ընթացքում ձեռք բերված հաջողությունները, իրագործված շինարարական ծրագրերը:

Այսպիսով Վեհափառ Հայրապետը Ս. Գրիգոր Լուսավորչի Ա կարգի բարձր պարգևն է հանձնում Երևանի նորակառույց առաջնորդարանի բարերարներ քեզգիսհայ տեր և տիկին Ժան և Սոնա Աբաջյաններին:

Ի դիմաց Մայր Աթոռի ճարտարապետների հանձնախմբի, ողջույնի խոսք է ասում տիար Վարազդատ Հարությունյանը:

Հայաստանի մտավորականության անունից Վեհափառ Հայրապետի զույգ տարեդարձները շնորհավորում և բարի մաղթանքներ է կատարում բանաստեղծուհի Սիրվա Կապուտիկյանը:

Խոսք է առնում նաև Սիյուրքահայության հետ մշակութային կապի կոմիտեի նախագահ տիար Կ. Դավաթյանը:

Հայոց Հայրապետի և Ս. Էջմիածնի Ամենայն Հայոց Հայրապետության հանդեպ արգենտինահայության որդիական սերն ու ակնածանքն է հայտնում Արգենտինայի հայոց թեմի առաջնորդ գերաշնորհ Ս. Գրիգորիս եպս. Բունիաթյանը: Սրբազան հայրը հատկապես ընդգծում է, որ Վեհափառ Հայրապետը, իր շինարարական գործունեությանը զուգահեռ, հասցըրեց նաև հոգևոր սերունդներ, որոնք ձեռնհասորեն իրենց ծառայությունն են բերում ինչպես Մայր Հայրենիքում, այնպես էլ արտասահմանի զանազան թեմերում:

Մայր Աթոռի միաբանության անունից ելույթ է ունենում դիվանապետ գերաշնորհ Ս. Ներսես արքեպիսկոպոս Պողապալյանը՝ հայտնելով միաբանության հավատարմությունը և անկեղծ սերը հանդեպ Հայոց Հայրապետի:

Վերջում շնորհակալության խոսքով հանդես է գալիս Վեհափառ Հայրապետը:

«Ես ուզում եմ իմ շնորհակալության խոսքն ասել մեր պետության ներկայացուցիչ պարոն Ստեփան Վարդանյանին և հարգարժան խոսք առնողներին, որոնք բոլորը անդրադարձան երեսուներկու տարիների իմ գործունեության և ջերմ բարեմաղթություններ արեցին ինձ: Այս առիթով հիշեցի անգլիական կյանքից մի պատմական պարագա անցյալ դարու վերջերին նշանավոր պետական-հասարակական գործիչ Վիլյամ Պիտի մասին: Երբ տոնախմբում էին նրա գործունեության հոբելյանը, ներկաները նրան գովերգում էին անշուշտ: Մեկը գովում էր նրա իմաստությունը, մեկ ուրիշը՝ դիվանագիտությունը, մեկ ուրիշը՝ նրա քաջությունը, արդարությունը և այլն: Պիտը իր պատասխանի մեջ հետևյալն է ասում. «Ես լսեցի ձեզ, բայց մեկ բան դուք չասացիք, որ իրապես իմ հիմնական արժանիքն է իմ համբերությունը»: Ես կարող եմ ասել, որ իմ պարագային էլ այսպես է: Համբերություն բառը բացասական ձևով պետք չէ հասկանալ, որովհետև համբերությունը ենթադրում է հավատ, վստահություն և լավատեսություն: Երբ համբերում ես, գիտես, որ գործդ պիտի հաջողի վերջ ի վերջո, նույնիսկ եթե որոշ դժվարությունների հանդիպես: Այդ գաղափարի վրա ես կուզեի ավելացնել մեկ ուրիշը ևս իմ պարագայի համար: Այն, որ այստեղ գալուց հետո ես շատ արագ կերպով, ես ինքս էլ զարմացա, կերպարանափոխվեցի: Իմ նախկին վերապահումները, երկյուղները, հայացքները մի կողմ մնացին և մոռացվեցին, և ես անձնատուր եղա, ճիշտ բառն եմ օգտագործում, անձնատուր եղա Էջմիածնի խորհուրդին և հայրենի հողին: Այսպես իմ առջև ճանապարհ բացվեց և կարողացա իրագործել այն, ինչ որ դուք գիտեք: Անշուշտ, սակայն, ես մի քիչ էլ բախտավոր եղա, որ այն վերականգնումը, որի մասին խոսում եմ հիմա,

այդ վերակառուցումը, եկեղեցական տեսակետից, մեզ մոտ այն օրվանից սկսվեց, հենց առաջին պահից, Հրաչյա Գրիգորյանով, հետո մյուս Խորհրդի նախագահներով, մինչև այսօր: Որովհետև մեր Խորհրդի նախագահները, ճիշտ է, անումները փոխվեցին՝ Հրաչյա Գրիգորյան, Գասպարյան, Դավաթյան, Պարսամյան, հիմա՝ Վարդանյան, բայց այդ բոլոր անունների ետև կար մեր պետության բարյացակամ վերաբերմունքը դեպի Մայր Աթոռ Ս. Էջմիածին: Այնպես որ ես գանգատվելու ոչ մեկ պատճառ չունեմ, արդար պետք է լինել: Եվ պետք է գոհություն տամ Աստուծո, որ այս ժամանակների մեջ այստեղ պաշտոնի կոչվեցի՝ վայելելով նաև գործակցությունը իմ հոգևոր եղբայրների, աշխարհական պաշտոնյաների, ճարտարապետների: Ծարտարապետները իսկապես մեծ գործ կատարեցին: Նրանք բոլորն էլ սքանչելի մարդիկ էին, սրտցավ, մվիրված, անշահախնդիր, մեր ժողովրդին ծառայելու գիտակցությամբ, որոնք անգնահատելի գործ կատարեցին: Ես կաղոթեմ առ Աստված, որպեսզի տա մեզ ժամանակ տակավին, որպեսզի կարողանանք շարունակել մեր սկսած գործը: Շնորհակալ եմ նաև այն բարեմաղթությունների համար, որ կատարվեցին իմ արտասահման ուղևորության կապակցությամբ: Պիտի աշխատեմ ես և իմ հետ եկողները՝ մեր պարտքը կատարել մեր Եկեղեցվո, մեր ժողովրդի, մեր հայրենիքի հանդեպ և երբ որ վերադառնանք ողջ-առողջ, պիտի պատմենք այդ բոլորի մասին: Մնաք խաղաղությամբ»:

Ծաշկերույթի ավարտին ներկաները բարի ճանապարհ մաղթեցին Վեհափառ Հայրապետին և հաջողություն ցանկացան իր Աստվածահաճո առաքելության մեջ:

*
* *

«Էջմիածին» ամսագրի խմբագրությունը ևս շնորհավորում է Ամենայն Հայոց Վեհափառ Հայրապետին՝ ծննդյան 79 և գահակալության 32-րդ տարեդարձների առթիվ՝ մաղթելով Նորին Սրբությանը երկար տարիների քաջառողջ կյանք և հովվապետական արգասաբեր գործունեություն՝ ի փառս Հայաստանյայց Առաքելական Սուրբ Եկեղեցու և համայն հայ ժողովրդի:

